



**Inissianik attartortitsisarneq pillugu Inatsisartut peqqussutaata § 60-ip allannguutissaanik kingusinnerpaamik UKA 19-mi saqqumiusseqqullugit Naalakkersuisut peqquneqarnissaanik inatsisartut aalajaangiiffigisassaattut siunnersuugut. Taamaalilluni attartortup toqukkut qimagunnerani utoqqat illuanulluunniit nuunnerani inoqutigiianni najugaqartut inigisaminnik anisinneqarsinnaanerannik pitsaanerusemik illersorneqarsinnaasunngorlugit. Uani ilanngullugu § 60, imm. 2, uniffiup appaa peerneqassasoq, taamaalilluni aamma § 60, imm. 1 aamma 2 allanngortinneqassasut ukiut marluk najugaqarnissamik piumasaqaataasup qaammatinut arfinilinnut allanngortinneratigut.**

(Inatsisartunu ilaasortaq Peter Olsen, Inuit Ataqtigiit)

(Siullermeerneqarnera)

**Attartortitsisup aningaasartuutit ilanngaatigereerlugit iluanaarutissaasa maanna 1,5%-iusut, Namminersorlutillu Oqartussani inissianik attartortut akilertagaasa ukiut pingasut ingerlaneranni atorunnaarsikkiartuaarneqarnissaannut, taarsiullugulu immikkut aserfallatsaaliinissanut atugassiissutitut inissiaqarfiit immikkoortortaanniinnarnissaannut Naalakkersuisut siunnersuummik suliaqaqqullugit peqquneqarnissaanik siunnersuut. Aserfallatsaaliinissami aningaasat oqorsaatit pitsanngorsarnerinut, matunut, igalaanut, qalipannernut assigisaannullu atorneqassapput.**

(Inatsisartunut ilaasortaq Aqqaluaq B. Egede, Inuit Ataqtigiit)

(Siullermeerneqarnera)

Uani oqallisigissavagut siunnersuutit attartortittakkanik ineqarnermut tunngasut Inuit Ataqtigiinneersut. Immikkoortoq 120 oqaaseqarfigeqqaassavara, tassani siunertaavoq inoqutigiianni attartortup toqukkut qimagunnerata kingorna imaluunniit paaqqinnittarfimmut nuunnerata kingorna inoqutigiit sinnerisa anisariaqalersinnaasut inatsisitigut illersorneqarnerunissaat.

Demokraatini siunnersuuteqartoq isumaqatigisorujussuaarput. Inuppalaanngilaq ilaqutariit aliasuttut ineqarnermut tunngasunik aamma ernummatissaanik tuniorarnissaat. Taamaattumik aalajangiiffigisassatut siunnersuummi tunngavilersuutaasut isumaqatigaagut tunngaviusumillu taperserlugit. Qilanaarpugut siunnersuutip ataatsimiititaliami itisilerlugu suliareqqinneqarnissaanut, tassani ersarissarneqarumaarpoq inatsimmi massakkut atuuttumi suut allanngortissallugit naapertuunnerussanersoq.

Tamanna tunngavigalugu innersuussutigaaarput siunnersuut Sanaartornermut Ataatsimiititaliamut ingerlateqqinneqassasoq.

Immikkoortoq 169-mut tunngatillugu isumaqataavallaanngilagut. Matumanimi pivarput siunnersuut aningaasarsiorneq eqqarsaatigalugu akisussaassuseqanngilluinnartoq. Siunnersuut Landskarsimut



angisuumik nanertuutaassaaq aamma siunnersuuteqartup isumassaqartinngilaa qanoq ililluni Landskarsimi amingartoorutaasussanngortussat akilerneqassanersut.

Attartortitsisup aningaasartuutit ilanngaatigereerlugit iluanaarutissaasa ullumikkut 1,5 procentiuvoq - siunnersuuteqartup taakku atorunnaarsinniarpai. Siunnersuuteqartulli ajoraluartumik eqqarsaatiginngilaa Landskarsi tamaasillutillu pisortat aningaasarpassuarnik annaasaqartussanngornissaat siunnersuut pissutaalluni. Siunnersuuteqartup isumaa naapertorlugu taava suut sipaarfigineqassappat? Tamanna pissanganassagalarpoq tusassallugu.

Tamatumunnga atatillugu aamma soqutiginnassaaq eqqaasitsissutigissalugu Akileraartarnermut Tungiuinernullu Isumalioqatigiisit - IA -p siuttuuffigineqartut naalakkersuisuuneranni pilersinneqarnikuvoq - siunnersuuteqartup siunnersuutaanut naleqqiullugu killormut siunnersuuteqarnikummat - tassalu attartortitsisup aningaasartuutit ilanngaatigereerlugit iluanaarutissai 4,5 procentinut qaffanneqassasut ukiut 6-t ingerlanerini. Tamanna tunngavigalugu siunnersuuteqartoq apererusuppara Akileraartarnermut Tungiuinernullu Isumalioqatigiisit siunnersuutigisimasaat taanna soq soqutigisimanninneraa.

Siunnersuut akisussaassuseqanngilaq aamma eqqarsaatigilluangaarpasinngilaq. Tamanna tunngavigalugu inassutigissavarput itigartinneqassasoq.